

ԵՂԱՆԱԿԻ ԿԱՆԽԱԳՈՒՇԱԿՄԱՆ ԺՈՂՈՎՐԴԱԿԱՆ ՀՆԱՐՆԵՐԸ ԸՍՏ ԵՐԿՐԱՅԻՆ ԵՐԵՎՈՒՅՑՆԵՐԻ

ՀԱՅԿԱՆՈՒՇ ՁԱՏԻԿՅԱՆ

Անհիշելի ժամանակներից մարդը ձգտել է կանխագուշակել եղանակը՝ Անձրեն ու ձյունը, երաշտն ու ավերիչ քամիները, ջրհեղեղներն ու բնության այլ տարերքները մարդուն ստիպել են պիտրել, ձեռք բերել պաշտպանական միջոցներ։ Նա յուրովի պայքարել է այդ երևույթների դեմ՝ ապաստանել է անձավներում, կառուցել բնակարան, կրել հագուստներ և երկար տարիների իր պրակտիկ գործունեության շնորհիվ ձեռք է բերել բազմաթիվ հնարներ, կուտակել հմտություններ՝ եղանակի փոփոխությունները վաղօրոք կանխագուշակելու համար։

Եղանակի կանխագուշակման ժողովրդական հնարները բազմազան են, դրանք ստուգվել են ժամանակի ընթացքում, և այժմ ժողովրդական այս գիտելիքների ուսումնասիրությունը ազգագրորեն ունի պրակտիկ նշանակություն։ Հայ ժողովուրդը եղանակը կանխագուշակել է արևի ճառագայթների գույնով, ինտենսիվությամբ, լուսնի դիրքով ու պայծառությամբ, ամպերի ձևով ու հեռավորությունով, կենդանիների ու թռչունների վարքով, մարդու զգայարաններով և այլ միջոցներով։

Փորձենք 1972—73 թթ. Հայաստանի հյուսիս-արևելյան շրջաններում՝ Կրասնոսելսկում, Շամշադինում, Նոյեմբերյանում և Իջևանում, Երևանի պետական համալսարանի պատմության ֆակուլտետի կազմակերպած գիտարշավի ժամանակ մեր հավաքած նյութերի՝ և հայ մատենագրության մեջ ավանդված տեղեկությունների համեմատական քննության միջոցով բացահայտել հայոց մեջ եղանակի կանխագուշակման ժողովրդական հնարները և տալ դրանց գիտական նկարագրությունը։

Եղանակի կանխագուշակումը մարդու մտամեական զգայաբանների միջոցով։ Մարդու երկար տարիների պրակտիկ գործունեությունը հնարավորություն տվեց ոչ միայն գտնել մթնոլորտային որոշ երևույթների առաջացման պատճառներն ու զարգացման օրինաչափությունները, այլև դրանք կանխատեսելու միջոցները։

Կլիմայական գործոնների օգտագործումը բուժական և առողջարար նպատակով սկսվել է շատ հնուց։ Հայտնի է, որ նույնիսկ անձավային մարդն իր կացարանը հարմարեցնում էր այնպես, որ անձավի ելքը լինի դեպի հարավ կամ արևելք, այսինքն՝ դեպի արեգակնային լույսը։ Ճերան, ով ուսումնասիրել է քամիները, կալթակներն ու եղանակը, հայտնի է հիվանդությունների ծագումը, — պնդում էր 16-րդ դարի բժիշկ Պարալցեսը¹։ Անձրևոտ ձգաճակից առաջ մարդն օդի պակաս է զգում, քունը տանում է, հաճախ, հատկապես ունամտիզմով տառապող հիվանդների մոտ, ոսկորներում և հոդերում ցավեր են առաջանում, ականջները խշշում են և այլն։ Դեռևս Հիպոկրատը նշում էր եղանակի փոփոխությանը նախորդող ցավերի մասին։ Միջին դարերում այդ նպատանիչների մասին խոսվում է իրավաբանական դեկրետներում։ 9-րդ դարում Ֆրիսլանդական (Նիդերլանդների մարզերից մեկը) օրենքների ժողովածուում գրված էր հետևյալը. «Խեղություն պատճառելու համար, եթե այն իրենից հետո թողնում է եղանակի փոփոխությանը զգայուն սպի, նշա-

* Գիտարշավի նյութերը պահվում են մեր անձնական արխիվում։

1 Եղանակագրք, 20. V. 1973.

նակվում է տուգանք»²։ 14-րդ դարի որոշ իրավաբանական փաստաթղթերում նշվում է նաև, որ վերք հասցնելու համար սահմանվում է ավելի ծանր պատիժ, եթե դա հետագայում եղանակի փոփոխության ժամանակ հայցվորին ցավեր է պատճառում³։

Հնագույն ժամանակներից մարդը նկատել է, որ եղանակի կտրուկ տատանումը փոփոխություն է առաջացնում նաև իր օրգանիզմում։ Նկատել է, որ որոշ մարդկանց օրգանիզմը գերզգայուն է մթնոլորտում կատարվող առանձին երևույթների նկատմամբ։ Դրանով էլ պայմանավորված է եղանակը կանխատեսելու նրանց զարմանալի հատկությունը։ Որոշ երկրներում այդպիսի մարդկանց անվանում են «եղանակի մարգարեներ»։ Այդպիսի «եղանակի մարգարեներ» ունի նաև հայ ժողովուրդը։ Այսպես օրինակ, մեր ուսումնասիրած շրջաններում գրեթե բոլոր ասացողները գիտեն, որ երբ մարդու ոսկորները և հոգերը ցավում են, անպայման անձրև է գալու։ Այգեծորցի Հակոբ Սառիկյանը և թովուզցի Սերյո խաչատրյանը նկատել են, որ անձրևից առաջ մարդը սկսում է ձգվել և ննջել⁴։

Տվյալ օրվա եղանակը Շամշադինում գուշակում են այսպես. եթե առավոտյան մարդու շնչառությունը վատ է լինում, նշանակում է այդ օրն անձրև է գալու⁵։ Բանն այն է, որ տեղումներից առաջ օդի հարաբերական խոնավությունն ավելանում է, և որքան մեծ է դրա տոկոսը, այնքան տեղումները հավանական են։ Խոնավության մեծ քանակի հետևանքով էլ անձրևից, հատկապես, ամպրոպից առաջ օդը դառնում է հեղձուցիչ, և մարդու շնչառությունը ծանրանում է։ Իսկ երկու-երեք ժամ հետո սպասվելիք կարկուտի կամ անձրևի գալը գուշակում են այդ, ոմանք էլ ձայն ականջի քորով⁶։ Ասացողների մի մասն էլ գտնում է, որ երբ քոր է գալիս այդ ականջը, անձրև է գալիս հաջորդ օրը⁷։ Սա հավանաբար մթնոլորտային ճնշման անկման հետևանք է, որի ազդեցությամբ ականջի թմբկաթաղանթը դուրս է սեղմվում և առաջացնում է քորի զգացում։ Նվ իրոք, այս ձևով հնարավոր է կանխագուշակել եղանակը։

Դաշտային ուսումնասիրությունը ցույց տվեց, որ եղանակի փոփոխությունն առանձնապես ուժեղ են արձագանքում հիվանդ մարդիկ, որ եղանակ կանխատեսողների մեծ մասը տառապում է այս կամ այն հիվանդություններով։ Կողքեցի Աղասի Բարսեղյանը ունի «լումբագո» կոչվող նյարդային հիվանդությունը. անձրևից երկու-երեք ժամ առաջ նրա մեջքը ցավում է, իսկ հետո՝ դադարում⁸։ Ահա դա էլ նրան հնարավորություն է տալիս նախօրոք իմանալ գալիք անձրևի մասին և ցավի թուլացման հետ միասին գուշակել անձրևի տևողությունը։ Թովուզցի Սահակ Կլեկչյանը եղանակը գուշակում է երիկամների ցավի միջոցով, նրա երիկամները սկսում են ցավել անձրև գալուց մեկ-երկու օր առաջ⁹։

Եղանակի փոփոխման նկատմամբ հատկապես զգայուն են վերքերը, սպինները, կոտրվածքները։ Հայ մարդը նկատել է (և դրանով ևս կատարել է եղանակի կանխագուշակում), որ վերքերը, սպինները, ցավազգաց տեղերը անձրևից երկու-երեք ժամ առաջ սկսում են ցավել, մրմռալ¹⁰։ Կողքեցի Վադինակ Դազարյանը թևը կորցրել է Հայրենական մեծ պատերազմի ժամանակ

² Նույն տեղում։

³ Տե՛ս հեղինակի դաշտային նյութերը, 1972, տետր № 1, էջ 3, 35 (այսուհետև՝ ԴՆ, № 1, 2)։

⁴ ԴՆ, № 1, էջ 40։

⁵ Նույն տեղում, էջ 19, 46, № 2, էջ 8, 26։

⁶ ԴՆ, № 2, էջ 12, 37։

⁷ Նույն տեղում, էջ 32։

⁸ ԴՆ, № 1, էջ 43։

⁹ ԴՆ, № 2, էջ 46։

և այժմ սպիտով կարողանում է գուշակել եղանակը: Սպին երբ սկսում է ուժեղ ծակծկել, նշանակում է, որ ուր-որ է անձրև կգա: Ամպամած ժամանակ ծակծկոցը լինում է միանվագ, իսկ հենց անձրևի ժամանակ՝ սուր¹⁰,

Այսպիսով, դժվար չէ բերված օրինակներից նկատել, որ «Եղանակի գուշակները» հիմնականում նախազգում են անձրևի գալը, և դա ամենևին էլ պատահական չէ, եթե, ի նկատի ունենալով անձրևից առաջ մթնոլորտում տեղի ունեցող հիմնական տարրերի փոփոխությունները, պարզենք, թե կլիմայական որ գործոնները կարող են ազդել մարդու օրգանիզմի վրա և ինչպես: Ըստ Ի. Պասինկովի, այդ գործոններից են րարոմետրիկական ճնշումը, օդի ջերմաստիճանը, օդի խոնավությունը (բացարձակ և հարաբերական), քամին (ուժգնությունն ու տեսակը), ամպամածությունը, արեգակնային ճառագայթները, օդի քիմիական բաղադրությունը և այլն¹¹: Հայտնի է, որ տեղումներից առաջ վերահիշյալ բոլոր տարրերը փոփոխության են ենթարկվում: Այնուհետև, Ի. Պասինկովը ավելացնում է. «Օրգանիզմի վրա օդերևութաբանական տարրերի ազդեցությունն է վկայում այն փաստը, որ մի քանի հիվանդություններ մասսայական բնույթ են ստանում եղանակի փոփոխության ժամանակ»¹²:

Կլիմայի այս կամ այն գործոնի ազդեցությունը մարդու օրգանիզմի վրա չափազանց բարդ է: Ըստ Գ. Մեզերնեցկու, կարելի է տարբերել օրգանիզմի վրա ազդող կլիմայական գործոնների հետևյալ տեսակները՝ 1. գործոններ, որոնք ազդում են մաշկի միջոցով՝ արևի ճառագայթները, օդի ջերմաստիճանը, քամին, խոնավությունը, օդի իոնացումը, տեղումները, մթնոլորտային ճնշումը, 2. գործոններ, որոնք ազդում են շնչառության միջոցով՝ օդի ջերմաստիճանը, խոնավությունը, օդի իոնացումը, քամին, օդի մաքրությունը՝ քիմիական և մեխանիկական իմաստով, 3. գործոններ, որոնք ազդում են զգայարանների միջոցով՝ արևի լույսը, օդի թափանցելիությունը, լանդշաֆտի գույներն ու ձևերը, քամիները, ամպրոպները¹³: Ահա այս ամենից հետո պարզ է լինում ասացող շավարշավանցի Գրիշա Թումանյանի եղանակը նախազգալու ունակությունը: Նա պատերազմի ժամանակ վիրավորվել է, և սպին անձրևից, ընդհանրապես, տեղումներից երկու-երեք օր առաջ ցավում է¹⁴:

Բերված օրինակներից չի կարելի եզրակացնել, որ միայն հիվանդ մարդը կարող է նախազգալ եղանակի փոփոխությունը: Անօրյա կյանքում հաճախ հանդիպում ենք «անառիթ» զրգովածությունների, ցրվածության «անպատճառ» նոպաների, տրամադրության անտեղի անկման և այլնի, որոնք արդի ֆիզիոլոգիան և ֆիզիոթերապիան կապում են եղանակի փոփոխության հետ: Կան մարդիկ, որոնք, հայտնի չէ գերզգայարանների, թե գերուշադրության հետևանքով կարողանում են իրենց փորձի ու հմտության միջոցով ճիշտ կանխագուշակել եղանակը: Այսպես, օրինակ, այգեծորցի Համբարձում Մաղաբյանը նկատել է, որ իր ախորժակի անկումը այդ օրը անձրև գալու նշան է¹⁵: Այս ձևով կատարվող կանխագուշակումը հավանական է այն պատճառով, որ անձրևից առաջ մթնոլորտային ճնշումը իջնում է, իսկ աղեստամոքսային տրակտում գտնվող զազերն ընդարձակվում են, որը և ուղեկցվում է ախորժակի անկումով:

Եղանակի կանխագուշակումը կենդանիների, սողունների, թռչունների, միջատների միջոցով: Հնագույն ժամանակներից շատ ժողովուրդներ, այդ թվում և հայերը, եղանակի տատանումների հետ միասին փոփոխություններ են նկատել կենդանիների, թռչունների, սողունների, միջատների վարքի մեջ:

10 Նույն տեղում, էջ 17:

11 Е. И. Пасынков, Общая физиотерапия, М., 1969, с. 285.

12 Նույն տեղում, էջ 285:

13 Նույն տեղում, էջ 289

14 ԴՆ, № 2, էջ 46:

15 ԴՆ, № 1, էջ 16:

Այգեծորցի Սառիկյան Հակոբը ասում է. երբ կենդանիներն ու թռչունները սկսում են անհանգստություն նշաններ ցույց ապր, դա համարյա միշտ նշանակում է, որ շուտով եղանակը կվատանա, անձրև կգա, սառնամանիք կլինի կամ ուժեղ քամի կփչի: Մինչդեռ կենդանիների ծուլը, հանգիստ վիճակը օրերի մոտավորապես նշան է: Երբ ծղրիվները երգում են, լավ եղանակ է լինելու¹⁶:

Եղանակի փոփոխության հետ կապված կենդանիների, թռչունների, միջատների, սողունների վարքի փոփոխությունները հայ ժողովուրդը, ինչպես նաև այլ ժողովուրդներ օգտագործել են եղանակը կանխագուշակելու համար: Այգեծորցի Կարապետ Քարտաշյանը եղանակը կանխագուշակում է այսպես, ծիծեռնակները երբ ցածր են թռչում՝ անձրև է գալու¹⁷: Գրեթե նմանօրինակ տեղեկություն կա «Գիրք վաստակոցում»՝ «Յորժամ տեսանես գծիծեռն ավելի խաղալ ի վերայ ջրոյն անձրևի նշան է»¹⁸: Այս ձևով կատարվող գուշակումը ճիշտ է, քանի որ անձրևից առաջ օդի հարաբերական խոնավությունը բարձրանում է, միջատների թևիկները խոնավանում են և շատ բարձր թռչել չեն կարողանում, իսկ ծիծեռնակներն էլ, որսի դուրս գալով, ստիպված են լինում թռչել համեմատաբար ցածր:

Ագռավը մեր ժողովրդի համար հանդիսացել է եղանակի հիմնական «գուշակներից» մեկը: Դեռևս Արատոս Սուլացին այդ մասին գրել է՝ «Եվ կամ ագռավն է անձրև գուշակում, Զևսի կաթիլին ձայնով նմանվում, կամ նորից ճշում կոնշում են հար, թևերը բախում սուլում են երկար»¹⁹: Այնուհետև Ա. Սուլացին գրում է. «Ագռավ, արջագավ երամներն առած, անձրևի գուշակ Զևսից առաքված, թռչում են դաշտում, անգղի պես ճշում»²⁰:

Ներկայումս եղանակի կանխագուշակման այս ձևը մեր ուսումնասիրած շրջաններում պահպանվել և կիրառվում է, սակայն որոշ փոփոխություններով՝ «ագռավները, երբ անձրևի ժամանակ կռռում են, նշանակում է անձրևը երկար կտևի»²¹ կամ «ագռավը, երբ շատ դա-դա է անում, նշանակում է անձրևելու է»²²:

Դաշտային և մատենագրական բազմաթիվ նյութեր կան, որոնցում եղանակի կանխագուշակման հիմնական միջոցը հանդիսանում են զանազան թռչունների ձայնարձակումները՝ ճայերի ճիշը, ճնճղուկների ծվլոցը, ծղրիդների երգը և այլն: Այսպես, օրինակ, երբ ճնճղուկը երգում է ընդհատումներով, ճոճոցի նման, նշանակում է այդ օրը անձրևելու է²³: Այգեծորցի Հակոբ Սառիկյանը եղանակը կանխագուշակում է «թիշ» կոչվող թռչունի երգով, որը ասացողի վկայությամբ, ձմռանը երբեք չի երգում: Թիշը բալի գուլնի թռչուն է, հավի ձվից փոքր, եթե երգում է, ուրեմն մեկ ժամ հետո անձրև կգա²⁴:

Այգեծորցիների համար եղանակի գուշակ է նաև «պապաճիշտ» կոչվող թռչունը՝ երբ պապաճիշտը (թիշի լավ թռչուն է) երգելով ասում է պապաճիշտ, պապաճիշտ, ուրեմն հաջորդ օրը անձրևելու է: Ասացողների համաձայն, պապաճիշտի երգի մի այլ տեսակի ժամանակ, եթե ամպամած էլ լինի՝ եղանակը կբացվի:

16 Նույն տեղում, էջ 12:

17 Նույն տեղում, էջ 11:

18 «Գիրք վաստակոց», Վենետիկ, 1877, էջ 11:

19 Գ. Վ. Արգարյան, Ա. Շիրակյանի վերագրված «Ծաղագս ամպոց և նշանոց» աշխատության մասին («Պատմա-բանասիրական հանդես», 1971, № 1, էջ 82):

20 Նույն տեղում:

21 Դն, № 1, էջ 51:

22 Դն, № 2, էջ 45:

23 Նույն տեղում, էջ 63:

24 Դն, № 1, էջ 19:

Եղանակի փոփոխման հետ միասին փոխվում է նաև հավերի վարքը: Հայ դուռը ցանկի ալ դ նկատել է և կիրառել եղանակը կանխագուշակելու համար: Եվ այդհետքով, և՛ թովուզցի, և՛ նոյեմբերյանցի, և՛ շավարշավանցի եղանակի գուշակներն ասում են՝ հավը երբ թևատակը բորում է, անձրև գալու նշան է: Նույն ձևով են եղանակը գուշակել Ա. Շիրակացու ժամանակակիցները. «Յոթ-ժամ ընտանի հալք և աստղակտուցը և ձկնաաղբ կտեն ի բանս գալով շարժեն դթեւ իւրեանց՝ յուղմունք ամպոց լինի»²⁵:

Գ. Մանդակունին հաղորդում է չվող թռչունների վարքի միջոցով կատարվող եղանակի կանխագուշակումների մասին. «Կոռունկն եթե ժամանակից առաջ գա, աշունը երկար կտեւ և ձմեռը անձրև ու ձյուն շատ կլինի, եթե ուշ գա՝ ձմեռն էլ ուշ կմնա»²⁶: «Յոթուտ և սառույց լինելու նշաններն են, երբ որ սագերը, կռունկները և ուրիշ տեղափոխ թռչունները խումբ-խումբ ժողովվում են»²⁷: Ինչպես երևում է բերված օրինակներից, չվող թռչունների վարմունքի միջոցով հիմնականում կատարվել են երկարաժամկետային, կարելի է նույնիսկ ասել սեզոնային կանխագուշակումներ (որոնց կատարումը նույնիսկ ներկա տեխնիկայի պայմաններում դժվար է), որոնց հավանականությունը այնքան էլ մեծ չէ և, հավանաբար, այդ է պատճառը, որ ներկայումս մեր ուսումնասիրած շրջաններում չեն պահպանվել նմանօրինակ գուշակումներ: Այդուհանդերձ, թովուզցի Կարապետ Արզումանյանը համոզված պնդում է այն հանրաճայտ իրողությունը, որ կռունկների չվելը ձմռան գալու նշան է²⁸: Ուսումնասիրված շրջաններում հատկապես շատ են տարածված մոշահավի (այստեղ տարածված թռչուն է) երգի միջոցով կատարվող կանխագուշակումները: Մոշահավը անձրևից առաջ սկսում է երգել²⁹:

«Յոթժամ եղինք ջոկեալ գուղորդն՝ կայտառելով երթան ձմռան նշան է»³⁰, կենդանիները ևս նախազգում են եղանակի փոփոխությունը և հայ ժողովրդի համար նրանց վարքի յուրաքանչյուրի փոփոխում՝ լինի դա խրխինջ, թե «սլար», լուսնահալ թե բառալ, օդ հոտոտել, թե երկար արոցել եղանակի կանխագուշակման նոր միջոց է հանդիսացել: Կողքեցի Գևորգ Բարսեղյանը անձրևի գալու նշան է համարում ոչխարների «խաղը», իսկ նույն գյուղացի Աղասի Բարսեղյանն անձրևի գալը գուշակում է խոզի վազվզելու, «պարի» միջոցով: Նոյեմբերյանցի Նուբար Գիշյանը գտնում է, որ երբ գոմեշն է «պարում», այն ժամանակ է անձրև գալիս:

Ուսումնասիրված շրջաններում կենդանիների մեջ լավ «եղանակագուշակը» համարվում է ոչխարը, որը նախազգում է և՛ կարկուտը, և՛ անձրևը, և՛ առաջին ձյունը: Հին բաշքենդցի Թոխտալյան Մագստաղը ասում է, որ երբ ամպրոպ է լինում և կարկուտ պետք է գա, ոչխարը փախչում է անտառ կամ որևէ տեղ պատսպարվում³¹: Առավոտյան, երբ անձրև է սպասվում, ոչխարը հանդ չի գնում³²: Աշնան վերջին ոչխարը երեկոյան, եթե տուն չի գալիս և անընդհատ արածում է, նշանակում է շուտով ձյուն կգա³³: Անասունների միջոցով եղանակը կանխագուշակելու մասին հետաքրքիր տեղեկություններ են հաղորդում մատենագիրները. «Յոթժամ խոյք յերեկօրեա բառաշեն՝ զամպ նշանակէ: Յոթժամ արջառ և ալլ անսունք զերկիր փորեն՝ զդէմս ի հարաւ արարեալ՝ ձմեռն նշանակէ»³⁴: Այժմ թովուզցի և այգեծորցի եղանակագուշակ-

²⁵ «Ա. Շիրակացու մատենագրությունը», Երևան, 1944, էջ 351:

²⁶ Գ. Մանդակունի, Ոսկե բարեկամ հայ ընտանեաց, Թիֆլիս, 1912, էջ 397:

²⁷ Նույն տեղում:

²⁸ Դն, № 1, էջ 37:

²⁹ Նույն տեղում, էջ 3, 37, 40:

³⁰ Գ. Վ. Արզուման, Նշվ. աշխ., էջ 92:

³¹ Դն, № 1, էջ 37:

³² Դն, № 2, էջ 32:

³³ Դն, № 1, էջ 45:

³⁴ Գ. Վ. Արզուման, Նշվ. աշխ., էջ 91:

նեբրը գրեթե նույն ձևով են կանխագուշակում եղանակը՝ «կովը, եզը, ոչխարը երբ նայում են հարավ, հոտոտում օդը և դեպի հարավ էլ արածում են, ուրեմն անպայման անձրև կամ ձյուն կգա»³⁵։

«Գիրք վաստակոցի» համաձայն անասունների դեպի հյուսիս գնալն անձրևի ազդակ է»³⁶։ Նույնը նշում է նաև Գ. Մանդակունին. «բոլոր կենդանիների դեպի հյուսիս փախչելը անձրևի նշան է»³⁷։ Թովուզցի Մելիք Սիմոնյանը անձրև է գուշակել նաև այն ժամանակ, երբ անասուններն արածել են խմբով³⁸։

Թովուզցի Արզումանյան շուկանները և Կլեկլյան Սահակը գուշակել են այսպես՝ «կովը, երբ բառաչելով հանդից փախչում է, կարկուտի կամ հեղեղի նշան է»³⁹։ Կողբեցի Մարիամ Արզումանյանն ասում է՝ «անասունները կարկուտից առաջ հավաքվում են, իրար պոզերով խփում, բառաչում, պոչերը շարժում»⁴⁰։

Հետանի կենդանիներից շուկը ևս եղանակի փոփոխման ժամանակ փոխում է իր վարքը, դառնում ավելի սիրալիր ու կարծես դրանով նախազգուշացնում մարդուն սպասվելիք անձրևի, կարկուտի մասին։ Թովուզցի Խաչատրյան Հակոբը և ծովիզցի Սահրադյան Արշակը ասում են, որ երբ այդ օրը կարկուտ է սպասվում, շները սկսում են ոռնալ⁴¹։ Մեկ երկու օր հետո սպասվող անձրևը Սառիկյան Հակոբը գուշակում է այս ձևով՝ շան քթից երբ ջուր է կաթում, նշանակում է անձրև կգա⁴²։ Թովուզցի Հակոբ Խաչատրյանի համար եղանակի գուշակման միջոց է շան անորոշ հաչոցը՝ գիշերը երբ շները լուսնին նայելով սկսում են հաչել, հաչոցը օրը տեղումներ են սպասվում⁴³։ Շան վարմունքի միջոցով եղանակի կանխագուշակման ձևը վկայում են Մատենադարանում պահվող № 1973 ձեռագրի հետևյալ տողերը. «Յորժամ շունք գերկիր փորեն՝ զձմեռն նշանակէ»⁴⁴։

Հետաքրքիր է այն փաստը, որ հայ մարդու համար եղանակի կանխագուշակման միջոց է հանդիսացել նույնիսկ միջատների վարմունքը։ Նա ընդհանրություն է գտել եղանակի փոփոխման և միջատների վարքի միջև և դրանով կատարել եղանակի կանխագուշակում։ Հին բաշքենդցի Սանամ Առաքելյանը դեռևս վաղ առավոտյան մեղունների վարմունքից գուշակում է, թե ինչպիսին կլինի այդ օրվա եղանակը. այսպես, մեղուն եթե առավոտյան փեթակից դուրս գալիս մի քանի շրջան է անում և հտ վերադառնում իր փեթակը, նշանակում է այդ օրն անձրևելու է, կարող է նույնիսկ կարկուտ գալ⁴⁵։

Տվյալ օրվա եղանակի կանխագուշակման այդ ձևի մասին Գ. Մանդակունին գրում է. «Եթե առավոտուց մունները, իշամեղունները, մեղունները և պիծակները շատանան, մամուկները օդի մեջ կամ բուսաց վերամ-սկսին պարել՝ օդը լավանալու նշան է»⁴⁶։ Իսկ Թովուզցի Հակոբ Արզումանյանը և այգեծորցի Հակոբ Սառիկյանը գտնում են, որ երբ մեղունները հանդից արագ փախչում ու պատսպարվում են փեթակներում, ապա նշանակում է, որ անձրև կամ կարկուտ է գալու⁴⁷։

35 Դն, № 1, էջ 4, 28, 39։

36 «Գիրք վաստակոց», էջ 13։

37 Դն, № 1, էջ 37, 39։

38 Նույն տեղում, էջ 51։

39 Նույն տեղում, էջ 37, 38։

40 Դն, № 2, էջ 22։

41 Դն, № 1, էջ 29, 57։

42 Նույն տեղում, էջ 4։

43 Նույն տեղում, էջ 28։

44 Գ. Վ. Արզումանյան, նշվ. աշխ., էջ 92։

45 Դն, № 2, էջ 62։

46 Գ. Մանդակունին, նշվ. աշխ., էջ 401։

47 Դն, № 1, էջ 12, 37։

Մեր ուսումնասիրած շրջաններում եղանակի կանխագուշակման միջոց է նաև մեղվի խայթոցի ինտենսիվությունը. մեղուն, երբ շատ է կօժում, նշանակում է անձրև է գալու⁴⁸: Այգեծորցիները նկատել են, որ անձրևից առաջ մեղուն արագացնում է իր աշխատանքը:

Հետաքրքիր է, որ եղանակի փոփոխման հետ հայ ժողովուրդը կապել է նույնիսկ մրջյունների վարքը: Սառիկյան Հակոբը նկատել է, որ երբ մրջյունները բնից «ծվաններ» տեղափոխում են ապահով տեղ, դա երկարատև անձրևի նշան է, իսկ երբ նրանք աշխատում են հանգիստ, առանց շտապելու, ուրեմն պետք է լավ օր լինի⁴⁹: Համանման տեղեկություններ կան «Գիրք վաստակոցում», ուր ասվում է. «Յորժամ տեսանեսս զմրջիւնքն, ուր զձուն իրեաց ի մէկ ծակէն ի մէկ այլև կրեն՝ նշան է անձրևի»⁵⁰:

Այգեծորցի Ասատուր Նաղարյանը մրջյունների վարմունքի միջոցով հետևելու կերպ է կատարում եղանակի կարճժամկետային կանխագուշակում՝ մրջյունները, երբ մի ուղղությամբ տեղափոխվում են, քուլում են, ամենաուշը երեք ժամից հետո անձրև կգա⁵¹: Եղանակի կարճժամկետային կանխագուշակում այգեծորցիները կատարում են նաև ճանճի միջոցով. ճանճը անձրևից մեկ-երկու ժամ առաջ ննջում, կպչում է պատին⁵²:

Հայոց մեջ հատկապես տարածված են գորտի կոկոռցով կատարվող գուշակումները: Այգեծորցի և Թովուզցի եղանակի գուշակները գիտեն, որ գորտերը երբ ջրի մեջ կոկոռում են միաձայն և տազնապով, ապա ուժեղ անձրև կամ հեղեղ է լինում⁵³: Գորտի կոկոռցի միջոցով կատարվող կանխագուշակման մասին արժեքավոր տեղեկություն է պահպանվել Շիրակացու մատենագրության մեջ. «Յորժամ դորաք առ միմեանս ժողովին եւ կռնեն՝ զյուսզմունս ամպոց նշանակեն եւ են գորտք որ կռչին գիւղնիովնքն ճշմարտեն առաւել զժամանակս եւ այնպէս մանրիկք են՝ մինչ տրդկունք կտեն զնոսայ»⁵⁴:

Թովուզցի Սահակ Կլեկչյանը գտնում է, որ գորտի ցամաքի վրայի կոկոռցն է անձրևի ազդակ⁵⁵: Կրծողներից միայն մկան միջոցով է կատարվել եղանակի կանխագուշակում, շնայած մեր ուսումնասիրած շրջաններում եղանակի կանխագուշակման այդ ձևը հայտնի չէ: Գ. Մանգակունին այդ ձևի մասին գրում է. «Անձրևի նշաններն են, երբ մկները սովորականից ավելի կվազվզեն, գորտերը լճերի մեջ կկոկոռան, որդերը բազմությամբ հողից դուրս կգան, մամուկները, սարդերը յուրեանց բուններից վայր կընկնեն, ճանճերը կծանրանան և ավելի սաստից կկծեն»⁵⁶: Ինչպես նշել է Ն. Հելմհոլցը, «Հնարավոր է, որ կենդանական աշխարհի առանձին ներկայացուցիչներ զգում են օդի խոնացումը, արևի ուլտրամանուշակագույն ճառագայթարձակումը, ռադիոակտիվությունը, ճրնջման, քամու, ջերմաստիճանի միկրոփոփոխությունները, օդի քիմիական բաղադրությունը և այլն: Մենք դեռևս շատ քիչ բան գիտենք այդ մասին, գրեթե ոչինչ չգիտենք և այն մասին, թե ինչ կապ ունեն այդ կարգի երևույթները եղանակի փոփոխության հետ: Գուցե և այստեղ է թաքնված եղանակը կանխագուշակու նրանց զարմանալի ունակությունը: Այդ հարցը գեռ ուսումնասիրված չէ, և մեզ սպասում են հետաքրքիր հայտնագործություններ»⁵⁷:

48 Նույն տեղում, էջ 12, 35:

49 Նույն տեղում, էջ 11:

50 «Գիրք վաստակոց», էջ 13:

51 Դն, № 1, էջ 41:

52 Նույն տեղում, էջ 2:

53 Նույն տեղում, էջ 3, 43:

54 «Ա. Շիրակացու մատենագրությունը», էջ 351:

55 Դն, № 1, էջ 41:

56 Գ. Մանգակունի, նշվ. աշխ., էջ 400:

57 Н. Ф. Гельмгольц, Погода, приметы и народные поверья («Человек и стихия», М., 1966, с. 20—21).

Եղանակի կանխագուշակումը բույսերի միջոցով: Բույսերի մի քանի տեսակներ հնագույն ժամանակներից մարդիկ համարել են եղանակի գուշակներ: Այսպես, հին հույները դիցաբանության մեջ ծիածանի աստվածուհի Իրիդաի անունով են կոչել ծաղկի մի տեսակը: Թերևս դրա պատճառն այն է, որ իրիսներն էլ ծիածանի նման հայտնվում են անձրևից հետո և կամ այն, որ այդ գույները շատ նման են ծիածանի գույներին: Ինչևէ, Հայկական լեռնաշխարհում ևս տարածված է ծաղկի այդ տեսակը և նույնպես կոչվում է Բիրիս: Հավանաբար, հենց այս ծաղկին ի նկատի ունեն նոյնմեբրյանցիները, երբ ասում են. «Ծաղկի մի տեսակ կա, հենց որ դուրս է գալիս, անձրևը դադարում է»: Նրանք դուրս գալ ասելով հասկանում են բացվելը: Ըստ Գ. Մանդակունու հաղորդած տեղեկությունների, անձրևի նշան են համարվում «երբ մկնականը ասած խոտը, արևածաղիկը ու ուրիշ մի քանի տեսակ բույսեր ծաղիկները փակեն»⁵⁸, Թովուզցի Հուսեփ Արզումանյանի համոզմամբ, երբ կաղնու, սալորենու և այլ ծառերի տերևները թառամում են, մեկ-երկու ժամ հետո անձրև է գալիս⁵⁹:

Մեր պատմագիրները գրեթե ոչ մի տեղեկություն չեն հաղորդել բույսերի միջոցով կատարվող եղանակի կանխագուշակումների մասին: Այժմ մեր ժողովրդի մեջ տարածված է այն կարծիքը, որ երբ մասրենին, խնձորենին, խաղողի որթը ուշ աշնանը բերքը վրան նորից ծաղկում են, խստաշունչ ձմեռ է լինում: Հնարավոր է արդյոք այս ձևով նախապես իմանալ, թե ինչպիսի ձմեռ կլինի, հավանաբար ոչ, քանի որ բույսերի երկրորդ անգամ ծաղկելու պատճառը երկարատև, տաք և խոնավ աշունն է: Դա ոչ թե ջոխատակ ձմեռվա նշան է, այլ բնության հերթական խաղ և, հավանաբար, երկարատև աշնան պատճառով է, որ սովորական ձմեռը, գուցե և ավելի ցուրտ և իհարկե ուշացումով եկած, թվում է խստաշունչ:

Գ. Մանդակունին տեղեկություններ է հաղորդում բույսերի միջոցով կատարվող ամբողջ տարվա եղանակի կանխագուշակման մասին. «Կաղնի ծառը եթե շատ պտուղ տալ՝ այն տարին շատ անձրև կլինի»⁶⁰: Գրեթե նույնանման մի տեղեկություն կա «Գիրք վաստակոցում», ուր, սակայն, կաղնու և այլ ծառերի պտուղների առատությունը կանխագուշակվում է անձրև ընդհանրապես, այլ ոչ թե տվյալ տարվա համար⁶¹:

Ուշագրավ է այն փաստը, որ հայ ժողովուրդը բույսերի միջոցով եղանակի կանխագուշակումներ առավել շատ կատարում է գարնանը, այսինքն բույսերի վեգետացիայի շրջանում, մի շրջան, երբ բույսերն ավելի զգայուն են դառնում ջերմաստիճանի, խոնավության, լույսի և այլի նկատմամբ: Այսպես, օրինակ, կողբեցիները ասում են, որ ծառերը գարնանը, երբ ուշ են ծաղկում, նշանակում է, որ ցուրտ է ապասպում⁶²:

Մեր ուսումնասիրած շրջանների բնակիչները եղանակը կանխագուշակում են նաև բույսերի շարժման միջոցով: Նրանք նկատել են, որ երբ ծառերն առանց քամու դանդաղ շարժվում են, ապա անձրևում է⁶³:

Թե որքան են հավանական բույսերի միջոցով վերոհիշյալ ձևով եղանակի կանխագուշակումները, առայժմ պարզ չէ: Սակայն հայտնի է, որ բույսերի վրա մեծ ազդեցություն ունեն լույսը, ջերմաստիճանը, խոնավությունը և քամին, որոնք բույսերի կյանքում նրանց զարգացման տարբեր փուլերում կարող են ունենալ տարբեր ազդեցություններ: Հավանաբար, վերոհիշյալ դոր-

58 Գ. Մանդակունի, նշվ. աշխ., էջ 400:

59 Դն, № 1, էջ 40:

60 Գ. Մանդակունի, նշվ. աշխ., էջ 397:

61 «Գիրք վաստակոց», էջ 13:

62 Դն, № 2, էջ 16:

63 Նույն տեղում, էջ 4:

ծոնների աղդեցությունների տակ բույսերի կրած յուրաքանչյուր փոփոխության (մարդու աչքին տեսանելի) ուսումնասիրությունն ու երկար տարիների սրականիկ դործունեությունն է, որ մարդուն հնարավորություն է տվել բույսերի միջոցով նախապես իմանալ, թե ինչպիսին կլինի սպասվելիք եղանակը։

Եղանակի կանխատեսման ժողովրդական հնարների ուսումնասիրությունը ցույց է տալիս, որ հայ աշխատավորը դարեր շարունակ եղանակը կանխատեսել է ուրույն մեթոդներով, որոնք դիմացել են ժամանակի քննությանը, և այժմ դրանց ուսումնասիրությունն ունի ազգագրական և օդերևութաբանական որոշակի նշանակություն։

НАРОДНЫЕ МЕТОДЫ ПРЕДСКАЗАНИЯ ПОГОДЫ ПО ЗЕМНЫМ ЯВЛЕНИЯМ

ԱՐԿԱՆՍՍ ԶԱՏԻԿՅԱՆ

Р е з ю м е

Человек в процессе своей жизнедеятельности приобрел удивительные знания в области народной метеорологии. В условиях сложного и разнообразного рельефа Армянского нагорья народ предсказывал погоду как по земным, так и по небесным явлениям. К земным методам предсказания погоды относятся изменение поведения животных, птиц и насекомых, органы чувств человека, растения.